

Q. D. B. V.

DE

BOTANICA,

PRO LOCO

IN ALMA EBERHARDINA

DISPUTABIT

P R A E S E S

ALEXANDER CAME-
RARIUS,

MEDICINÆ DOCTOR ET PROFESSOR
EXTRAORDINARIUS,

RESPONDENTE

JOHANNES FRIDERICO
ENGEL,

TUBINGENSI,

IN AULA NOVA

AD DIEM SEPTEMBRIS,

ANNO MDCCXVII.

TUBINGÆ,

LITERIS HIOBI FRANCKII.

V I R O
PLURIMUM REVERENDO AC
DOCTISSIMO,

M. JOH. SEBASTIANO
HARTMANNO,

Dioeceseos Herimontanae Superinten-
denti Speciali, Ecclesiaeque urbanae Antistiti
Meritissimo,

*Domino Avo Suo ad cineres pie Venerando,
Colendo,*

Exercitium hoc Academicum,

*De lato Anni Octogesimi ingressu,
adjuncto omnis prosperitatis voto,
gratulabundus*

offert & dedicat,

obedientissimus nepos,

JOH. FRIDERICUS ENGEL,
Respondens.



Σ. Θ.

HAs est venerari tenorem Statutorum Academicorum, nec licet subterfugere Disputationem pro Loco. Itaque in lucem prodeo, non quasi qui prætendam Excellentia Opponentium satisfacere, quàm quòd hanc discendi occasionem præsumo favorabilem. Nec prolixo mihi opus videtur procemio: sive enim thematis ipsius foret reddenda ratio, sive elaborationis præmittenda excusatio, non è longinquo quidem petenda videtur utraque. Liberum erat seligere illud, quanquam per Medicæ amplitudinem Artis non defuissent varia; quæ tamen Professioni Extraordinariæ accessit Horti Medici cura vicaria, cogitationes determinavit ad Botanicam. Materiam indè paro disputandi, non tam docere quoscunque ausim, quàm problemata proponere Doctioribus, quod licentiæ genus non ægrè feret nota & laudata Ipsorum Humanitas. Illud autem potius agendum ientio, piis contendere precibus apud Deum, (qui plantare, rigare sinit, jubet, Ipse sibi reservans præcipuum, dare incrementum) velit sparsa mentibus veri bonique semina fovere, ducere ad lætam segetem & messem, in Divini Nominis gloriam, & ægrorum salutem!

I.

Qui Botanicâ Veterum melius intellectâ, rectius explicatâ, inclaruerunt Autores, præter subsidia Philologia, Artesque Criticas, ipsam plantarum notitiam sibi fecerant familiarem, & sic merentur laudari in exemplum.

Hanc thesin conformem velim probatâ illorum sententiæ, qui ad explicandum melius Hippocratem, linguæ quidem græcæ cognitionem, manuscriptorum fidem, & cætera beneficia, magni æstimant, ceu par est, mediis tamen modisque omnibus superaddunt non modo ipsum tantæ dignitatis Autorem, *Hippocratem* illustrando per *Hippocratem*, locum hunc & textum hujus libri declarando per illum alterius, verum insuper optimum *practicum* optimum ejus dicunt *interpretem*, (vel si mavis *judicem*.) Quippe qui non intelligatur rectius, ac à praxeos benè perito: Qualis post *Vallesium*, *Duretum*, *Martianum*, meruit dici *Baglivus*; & cujus instituti specimina suppetunt ut per scripta *Cel. Ståblii* sparsim, sic ex professo in programm. *apostaseos & apostematos differentia, historia pathologica affectuum cum coxarum dolore symbolizantium, Ileos hematites, &c.*

Gracè scripserunt Botanicorum *Primicerii*, *Theophrastus* magis philosophicè, *Dioscorides* ad usum magis medicum: Difficultas intelligendi, quid sibi voluerint sæpè per plantarum nomina nobis incognita, non tam fundatur in linguæ non satis notæ obscuritate, quàm descriptione ipsarum brevi nimis, imperfectâ, non factâ ad normam & regulam certam, constantem & evidentem. Sunt nobis etiam hîc *Variantes Lektionen*, ad marginem textûs Commentatorum studio expositæ; Non desunt libri, de quorum Autore dubitatur, utrum sint ejus, cujus nomen præ se ferunt, e. g. Ille *Aristotelis* de *Plantis*, utrum sit genuinus an spurius, quoniam ex Arabico in Græcum translatus: Et quæ per amplam *Etymologiæ, Synonymorum, Homonymorum* classem occurrent *Artis Criticæ* objecta plurima. Quibus quidem destinabatur *Pinax Casp. Bæubini*, seu Index in *Theophrasti, Dioscoridis, Plinii & Botanicorum*, qui à seculo scripserunt, opera; ut post ipsum non tamen defuerit, nec desit, Illustrium Commentatorum exemplo, *Bodæi à Stapel, Salmasii, &c.* quod adhuc mereatur discuti.

Ordine temporis primus est, qui evolvi & laudari meretur *Plinius*, interpret Græcorum, doctæ compiler antiquitatis, ingentem natura

turæ & artis exponens thesaurum, ut præter lapsus suos & errores, ingeniosâ crisi ostensos & correctos, inter vana etiam quæ videntur & superflua, commune herbariorum vitium, nimîâ virium & laudum copiâ lectores obruentium, ut, inquam, non possit non placere, seu styli confideres latini auctoritatem, seu uberem materiæ jucundæ & utilis varietatem. Ita quidem videtur mihi, etiam post lectum illud *Helmontii*, in princ. *Dispensatorii*: *Dioscoridis verba Plinius à vero & falso non potens distinguere, multis conspersit nugis. Ut-pote judicio egenus multa undecunque corradens descripsit, ut tomi magnitudine nomen æquet.*

Ultra græcam ascendere non ausim, linguarum orientalium non benè gnarus, quid *Hebræus* & *Arabs*, quid *China* vel *Malabar*, aut promittat aut debeat *Botanicæ*, hîc modò transeat: *Summè tamen Rever. Præsulis Hilleri Nostri studio in illustrandis plantis biblicis occupato felicem apprecari successum fas erit.*

Ut autem fidem faciam thesi meæ, provocare liceat ad specimina recentissima instituti laudabilis, quo præsupposita plantarum cognitio exoptatam plantis benè multis lucem attulit. Jucundum tale connubium *philologiæ cum medicinâ* botanicum exhibuit hætenus tot programm. curiosis *Cel. Wedelins, de Moly Homeri, Amello Virgilii, Oenanthe, Theseo Theophrasti, Cirsio Dioscoridis, Corchoro inter cetera, &c.* integris etiam *Diff. d. Cuscutâ, Centaurio, &c.* Incensum istum terminorum ab antiquitate obscurè relictorum, nec à posteris satis intellectorum, refero etiam, quod *Scaligero, Salmasio*, crucem fixit, *Bryon* veterum; quod ipsum tamen diutius latere non potuit, postquam eundo in rem præsentem feliciter expeditum fuit à *Vener. Parente meo*, quo jure tam *mus. o* cuidam tribuatur, quàm *lapulo*, & pluribus, imò omnibus, quibus defunt petala, sunt solum conferti *apices*, plantis, non ad ostentationem modò, sed & ad ergon physicotaton: vid. epist. Ipsius laudandam in seqq.

Erunt fortè qui dubium moveant, utrum operæ sit pretium, laborare in eruendis ex antiquitate thesauris, incertis; an non præstaret, consulere naturam ipsam, cum Recentioribus, ita perficere *Botanicam*, & invenire, quod per otium monstrare possint alii, jam olim fuisse scriptum veteribus, sed non satis intellectum ab omnibus naturæ non satis gnaris. Ego ut hanc prætensionem

omninò justam veneror, ita hæreditatem istam veterum non præmittendam censeo, sed locupletandam utique, nec aliâ ratione felicius, quàm dictâ & amicâ Veterum & Recentiorum conjunctione. Placet in partes vocare *Schelhammerum*, & *Listerum*; illum ex *Introd. ad Conring. & Epist. ad Viros Celeberr. Rajum & Rivinum, Theophrasti* libros commendantem ex merito: Hunc in *Exercit. Med. Morb. Chronic.* subinde advocantem testimonium *Dioscoridis*, & Sociorum materiæ medicæ scriptorum veterum, ubi inter alia paradoxum multis elaterii, hieræ diacolocynthidos, usum suæ præxeos fide vult confirmatum. Nihil ergò hîc moliendum inconsultâ naturâ, non fingendum, sed inveniendum, quid natura faciat aut ferat; aliàs metuendum, vel tandem agnitum iri lubricam vanarum traditionum fidem. Uti quidem *J. Rajus* in *Hist. Plant.* famoso phænomeno, palmam prævalidam esse ad sustinenda pondera, non flecti deorsum, ut cætera ligna, sed ponderi renitendo sursum incurvari, audacter contradicit, ut periclitetur omninò ingeniosum, sed minus ad fidem naturæ plantarum compositum emblemata, crescit sub pondere palma; prout etiam *flores solisequi* minus observantur accurati in campo, in horto, quàm in libris & picturis: vid. tamen thesin XVI. *Disp. d. Cichor.* quâ florum heliotropiorum expansionem ad analogiam thermometri revocavit *B. Avois, E. R. C.*

Cæterum, thesin meam invenio comprehendere sub requisito criseos generali: Oportere Critico, qui scriptorem interpretari aggreditur, notam esse rem, de quâ Scriptor agit. Quod inferendum suæ criticæ censuit *Cel. Clericus* in præf. edit. ann. 12. cui in bibl. choif. *Galenus* noster non minus bonus Criticus, quàm Medicus.

II.

Quo cum studio, quo cum successu excolatur Historia, testantur fructus inde ut quaquaversus, ita & in Botanicam redundaturi; quin imò vicissim monumentum singulare Herbarium promittitur historiæ magni momenti,

NON æquè hîc intellectam volo *Historiam Botanicæ*; quanquam scientiarum & artium historiæ sunt ad gustum sæculi: quam tamen si quis desideret, longè o Autorum censu, cum loco & tempore editionum præmissam inveniet laudato *C. Bauhini* *Pinaci*, auctam, continuatam, à *Rajo* ad *Hist. Plant. & Supplem.* s. tomum tertium, qui-

quibus accedere poterit lectio jucunda introductionis *Conringii & Schelhammeri*.

Etiam *Historiam naturalem* non anticipabo; uti quidem suos de *Historiâ Plantarum* libros inscripsit & præmisit sequentibus de *plantarum Causis Theophrastus*. Ecquis enim ausit progredi ad philosophiæ *naturalis* partem *rationalem*, nisi viam sibi paraverit per *experimentalem*. Non observando saltem sed & tentando, imò, si fas sit ita loqui, secus ac quibusdam videtur, naturæ quandam quasi vim inferendo; exemplo *mercurialis*, in *misc. nat. cur.* dec. 2. ann. x. tali examini subiectæ.

Nec conquiram ex *Historiâ antiquâ*, plantas vel quibus delectati veteres, e. g. dilectam Xerxi, cultam Romanis, *Platanum*, (quin domestica recolimus, & *Eberhardi* Gloriosi Fundatoris ex palestiniâ delatum, in viciniâ sylvæ plantatum, *Spinæ* ramum, læti incrementi symbolum, memoramus.) Vel quibus memoriam conservarunt suorum, exemplo *Lysimachia*, *Artemisia*; quos imitabundi Recentiores Botanici nobis dederunt *Hermanniam*, *Bignoniam*, *Fagoniam*, &c.

Gratâ potius mente manuque accipiendum erit, quicquid novi ex antiquitate nobis ostenderit Historicorum diligentia. Ex monumentis veterum artis ipsorum cuforiæ, sculptoriæ, fusoriæ testimoniis sicubi tempus edax rerum ea non consumserit, sed reservaverit nostræ ætati reproducenda, inter alia spem facit *Numismatica Scientia*, fore ut figuræ nobis exhibeantur non tam notæ lauri, myrti, quàm vel ex deserto Lybiæ ab ipso Ammonis oraculo petitiæ plantæ gummi resiniferæ. *Illustris* enim Operis *Spanhemiani* Dissertatio Sexta, de præstantiâ & usu numismatum antiquorum ad plantarum historiam, *Silphium* inprimis, *lotum*, *strobilum*, *balanustum*, *malum medicam*, *persicam*, *besperidum*, *palmam*, *balsamum*, *arborem thuriferam*, *calamum odoratum*, *dictamnium*, *myrrham*, *bypoglossum*, &c. & figuris & verbis veterum ita explicat, ut priorem tamen meam thesin confirmet. Non minus insigne est exemplum *Papaveris* & *Nerii*, quod utrumque solers industria Cel. Eph. Nat. Cur. Directoris *Lochneri* demonstravit, interque alia monuit, ramos quos Dñi Marini Dextæque manu tenent, & in gemmis, numisque & aliis antiquitatis monumentis exhibent, non veræ laurus esse, sed agrias daphnes, vel rhododaphnes, quæ est *Nerium*. Ita etiam in *Mem. de Trevoux*, Martio hujus anni sur une medaille d'Herode le Grand figura prætenditur esse *Lilii*,
non

non *Albi*, suaveolentis, ab Occidente, sed ex Persiâ, dicti *Corona Imperialis*; hanc esse intelligendam per liliū in Scripturâ Sacrâ. Qua occasione recordor, me legisse in *Giorn. d' Ital.* t. XVI. phænomenon notabile, sc. *cantharis liliorum*, coronæ etiam imperialis, non liliasphodeli, *hospita*, melius discrevisse dicitur plantas, ac botanici.

Quantò magis gaudebimus, si accesserit artis pictoriæ vett. documentum. Uti quidem Laud. *Schelhammerus* l. c. cap. i ix. & x. ex inspectione codicis antiqui mille ducentorum annorum *Bibliothecæ Cæsareæ* ex oriente illati sibi multum promisit, quippe dicebatur figuris plantarum *Dioscoridis* ad vivum depictis, ipsorumque *illustrum medicorum vett.* iconibus, accuratissimâ delineatione, & vivacissimo post tot secula coloratu expressis, mirificè exornatus. Suspectum videtur de tali tantoque opere hætenus silentium. Priori seculo inclaruit *Hortus Eystettensis*, cujus illuminati mentionem fecit G. *Francus* in app. *palingen.* cujus exemplar ostendit *Inclyta Noriberga*, cum adhuc ipso delineationum originali: Nostro autem post *Muntingii* Phytographiam in fol. 240. tabb. constantem, eminet *Amstelodamensis*, officinæ *Wetstenianæ* ornamentum, centum redimendum imperialibus; quippe figuras fideles & accuratas suis ad vivum coloribus repræsentans. Quo non obstante splendidum tamen *Cel. Rivini* opus, ut compleatur, licebit optare. Quanquam nec nostri quondam *Leonb. Fuchsii*, nec *Joach. Camerarii* ad *Matthiolum* iconismi sine laude sint prætermittendi; Etenim floris & seminis figuram distinctius expressit ille, quod *Gesnerus* inchoaverat, *Columna* fuerat prosecutus, perfecit *Cel. Tournefortius*. Non dicuntur hæc in præjudicium *Herbarii Vivi*, quippe quod in subsidium memoriæ venit egregiè; ego quidem plenius non vidi, ac apud Exc. Dn. D. *Heisterum*, quippe quinque millium plantarum.

Debitorum itaque se fatebuntur botanici historiæ; sed & vicissim debitor erit rei herbariæ historia: Si quidem famam tuetur & assensum meretur noviter in lucem productum *Herbarium Diluvianum*, fidem quippe faciens malè quibusdam negatæ universalitati submersionis olim terræ, & subversionis per aquam in Scripturâ Sacrâ descriptæ. Quæ quidem non videtur objectum fuisse credulitatis Laud. *Clerici*, unde in bibl. chois. tom xvii. & xx. Curiosissimo *Scheuchzero*, Ejus defensori dexterrimo, assensum præbere recusat, mavultque recurrere ad naturas *Cudworthi* plasticas, ne-

scio

scio quas, nec adhuc à philosophorum concilio in suam receptas Ontologiam. Quandoquidem verò lapidum figuratorum genesis & origo non est eadem, sed variat, ceu videre est in Oryctogr. Noric. Exc. Baeri: Sepositis ergò tam *marmore florentino*, quàm *lapide papenhemensî*, &c. utut antiquis, quorum lineæ schema vegetabile exhibent utcunque, ad imaginationem potius, quàm veram plantæ alicujus effigiem, referendæ ad originem non abfimilem tractibus striarum pulpæ pigmenti super porphyritem triti succo quocunque intercepto inter duo solida, compresso & expresso in radios ramosos; Sepositis etiam novellis ut foliorum, sic reliquarum plantæ partium, *incrustationibus*, ad impressas *topho* figuras. Præter hos hoc sensu dictos *Dendritas*, minus controversæ originis, & præter figuras novitias quascunque, supersunt lapides *schematismo vegetabili* insignes, accuratè magis & exquisitè, rariores, altioris & antiquioris ordinis, iconismi si non Europæi, forsan tamen Indici, ad confirmandam, cui post Scripturæ auctoritatem confirmatione quidem non foret opus, diluvii historiam, tanquam monumentum singulare, in fidem ruinæ horrendæ in his reliquiis agnoscendæ, eò fortius, quò plura ex animali regno ad latus vegetabili ponuntur rudera, in testimonium mutuo consensu firmitus: uti quidem vel ex recentiori constat titulo *Musei Diluviani*.

Non desunt dubia, sunt, fateor, rationes, adversus longinquam istam originem, (& quid est in naturæ obscuritate liberum ab omni scrupulo?) quales e. g. proposuit *Rajus* in præfat. ad Synopsin Stirp. Brit. imò quarum plurimas conquissivit singulari studio *C. N. Langius*, & nuperrimè ad Suppl. *Stablii* *Beccher*, instantias exhibuit *Nebring* in *Paling*. Franc. Enim verò concipi tamen & defendi posse videtur faciliùs præ *ideis*, *archæis*, *insubis*, *semine*, non plantam, sed plantæ modò partem generante, in materiâ lapideâ, & sic adhuc imprimendam ipsi, vel *spiritu* imaginem modò ejus adumbrante, aut quicunque novus plastes recenter prætendatur figurare fossilia vegetabilia, verosimilius, inquam, vetera esse, quæ ex profundo eruuntur, ab olim abscondita, delata cum fluctibus, sepulta in limo. Undè & hanc de Diluvii Reliquiis posuisse liceat thesin; donec rationem Ingeniosior dederit meliorem.

III.

Videntur rogandi Logici, velint docere in actu signato, quod facile transferri possit in exercito ad plantas distinguendas per genera in species: quid sit essenziale, quid accidentale? à quo desumi debeat differentia?

Dirigendus enim erit intellectus in ritè ordinandis plantarum prædicamentis, formandis definitionibus, instituendis denique divisionibus, quin & examinandis tabulis. Ratio petendi auxilii venit à nimia non tam ipsarum multitudine, quàm varietate, quæ quanta sit ex sequentibus constabit, quam in ordinem redigere, negotium utique logicum est, exercitium *Botanica Logica*. Occasionem autem desiderio dederunt, non æquè Veteres, quorum hallucinationes perstringi ferè desierunt, quàm Recentiores, quorum methodi invalescunt, sed variantes, non concordantes. Credibile autem est, nos remissum iri ad doctrinam de prædicabilibus, ad instruendum inde ordinem secundum differentias genericas & específicas, attendendo quàm differant vel genere, vel specie. Ubi tamen perventum fuerit ad applicationem notionum secundarum, forsan jubebimur pergere ad physicos, ad inquirendum ex naturæ sinu, quid sit essenziale plantis; nisi abstereret triste illud: *Formæ rerum latent*. Ut recurrendum videatur ad consilium priorum, ubi non suppetit τὸ essenziale à priori, circumspiciendum esse ad proprium, quod à posteriori solet ita dici. Sit *signum* modò certum & constans differentia specificæ, utut in ipso hæc non consistat; Si vel maximè se abscondat interna natura, habebit tamen forte *characterem*, quo se prodat. Nomen plantarum in *Memoir. de l'Acad. des Scienc.* ann. 1700. est definitio, importans genus & differentiam specificam; ut pro generibus sint flores & semina, folia & radices pro speciebus. E. g. Est *Umbellifera*: Ergò pentapetalos, gymnodispermos; vel insignis flore polypetalos rosaceo. Est *Valeriana*: Ergò pentapetalodes, gymnomonopappospermos; vel in censu herbarum quibus flos monopetalus infundibuliformis. Est *Brassica*: Ergò tetrapetalos uniformis filiquosa; vel in classe herbarum flore polypetalos cruciformis. Quondam *peonia aconitum*; nuper *raphanus rusticus cochlearia* voluit vocari, & *nummularia lysimachia humifusa*, &c. quàm justè,

disquiram cum meis: Perinde, ac num lupo canis, avicula canariensis dici possit passer, &c.?

Obversantur autem animo specimina Definitionum aliarum curiosarum, vel difficilium, vel vexatarum, à quibus analogiam fortè quis possit petere ad nostras botanicas. E. g. famosa quam *Diogenes Platonis* per ironiam obtulisse fertur, hominis: *Animal implume, bipes*, nil falsi quidem dicit, utut addendum fuerit *platonychon*, ut omni soli & semper conveniat, ne sit communis gallo gallinaceo, deplumato. Ponam ad latus descriptionem *Canis*, juxta ductum utique prolixum tabb. *S. Dale*: *Animal quadrupes*, (viviparum, cui cor duobus instructum ventriculis, pulmo solutus, &c.) unguiculatum, pede multifido, digitis divisis, unguibus angustioribus, dentibus prioribus incisioribus in utrâque maxilla quaternis, carnivorum, rostro productiore & caudâ præditum, &c. hæcenus omnia habens communia cum lupo & vulpe, ab his ergò qui differt? Pilis brevibus & rarioribus; cum illi densis & longis vestiantur, auriculas habeant erectas, major lupo, minor vulpes. Ad alia respexit *Helmontius*, canem moraliter magis describendo, d. Astr. §. 35: *Canis est animal vorax, mordax, invidum, vigilans, latrans, venaticum, & unicam ob bucellam omnium beneficiorum immemor, ingratum, adulativum, &c.* & si quæ sunt proprietates, præter illas speciei, vel si mavis generi, communes, plures huic illive individuo, à parentibus insuper (adde disciplinâ) propriæ; usque adeò, hinc canum profapiam pretio differre.

Quò minus autem in plantarum regno pristina regnet confusio, debetur singulari diligentia & accuratæ inspectioni Virorum de re herbariâ Meritissimorum, sc. Itali *Cesalpini*, *Morisoni* Scoti, *Raji* Angli, *Tourneforti* Galli, Germanorum *Hermanni*, *Ammanni* cum *Exc. suo Nebelio*, & *Exc. Rivini*; quibus suo tamen jure accedit *Accur. Chr. Knant*, & accessurum spes est *Exc. Volcamerum*, juxta id, cujus spem fecit in præf. *Floræ Noricæ*. *Quamvis adhuc* (liceat uti verbis *Dn. Valentini Jun.* ex præf. *Tourn. Contr.*) aliqua in methodo illorum discrepantia occurrat, ita ut hi genera plantarum è floribus, illi ex seminibus, eorumque capsulis, isti mox è floribus, mox è seminibus & fructibus, alii denique ex omnibus simul partibus sumenda esse suadeant, discrimen tamen illud ita comparatum est, ut cœnobia & trivia ad regiam tandem viam redeuntia, ad eundem Botanophilos scopum, b. e. solidam

plantarum notitiam & dignotionem , deducere valeant. Compendium numerosæ hujus profapiæ justo ordine exhibent Definitiones Exc. Dn. Pr. *Creilingii*, cum cæteris ad *Veget. Regn.* spectantibus ; ut omnino phycos à difficultate generalium ad amœnitatem partis specialissimæ in campos & hortos vocent & alliciant.

Non perindè se habent in tanto numero plantarum familiæ : Multas communis florendi & fructificandi modus conjungit ita, ut nullus ausit vel ite disjungere botanicorum, si vel maxime nomen olim ipsis classive datum omittat vel reformet, [ut sunt dictæ umbelliferarum, verticillatarum, &c. familiæ : Ex adverso, nec sunt paucae, *sui*, ut sic loquar, *generis*, (uti *particula philosophorum*, uti *acidum pathologorum*.) quarum habitudo ad invicem non est talis ac tanta, ut priorum, quarum convenientia non est nisi in tertio qualicunque, undecunque quæsito, quæ autem differunt ab invicem modis pluribus, potioribus. Meretur *systema* illarum omnino dici *naturale* ; harum *artificiale* audit in laud. *actis Acad. Sci. Gall.* ubi locus videbatur esse ordini arbitrario, quem sine cribratione tamen non dimisit *Laud. Rajus*, cujus vicissim *anomala* reprehenduntur ab aliis & volunt (si pote) deduci ad sua loca.

Mihi sine cujuscunque præjudicio liceat fateri, magis arripere illam plantæ ideam, quæ plenior modum non florendi modo & ferendi semen, sed & crescendi, sicubi notabilem & constantem servat & exhibet rationem, integrum mage Schema proponit, ad dealbandum quasi unâ fidelâ duos parietes. Porro, quò plus est convenientiæ simul in fructificatione & facultatibus plantarum, eò videri meliorem & utiliorem methodum ; juxta id, quod in *Disp.* Dn. D. *Gmelini* sub hoc titulo latius fuit expositum. Controversias destino conflictui, tam speciales, quàm generales, imò generalissimas, tentaturus quo cum successu possim defendere theses sequentes : Esse servandam divisionem *plantæ* in *arborem* & *herbam*, distinctè has species recensendas, ubi tamen sufficiens est convenientiæ character qualis *acetosæ*, *sedi*, *geranii*, *malvæ*, quin & *genistæ*, &c. arborecentium, manendum in terminis herbarum. Discrimen plantarum in germinatione vel *bifoliarum*, vel *unifoliarum* esse primum & fundamentale, quod & vetat *hexapetalas* aut *hexapetalotas* vel aliis diversis interferi, vel ab invicem divelli ; quas præter plantulæ seminalis modum, vasculum *tricapsulare*, & *gemma subterra-*

terranea bulbus conjungit. *Cerinth* non debere disjungi ab asperifoliis, per ea, quæ leguntur in *misc. nat. cur. dec. 2. ann. ix. Gramina & frumenta* florere, atque adeò apices movere controversiam statûs petalis, & aspirare prætendendo ad titulum *floridum*. Quo jure, quo sensu, in quo sui, *flos* gerat nomen *partis essentialis*? an in exclusione ad omne reliquum plantæ? Valere omninò hîc dictum: *Ex fructibus ipsarum cognoscetis ipsas*; Casu quo vel folium, vel & flos; non sufficit, aut deficit, aut decipit, ut de specie dicam, quod de bonitate legi nuper ex *stromat. Clem. Alexandr. in mem. trev. mart*: *On connoit la bontè de l' arbre non par les fenilles, ou meme par ses fleurs, mais par les fruits, qu' il porte.* Ita est, expectandum usque dum non modò suo tempore floreat, sed & semen ferat primum visa planta, prius non determinabitur, nec locabitur tutò. Male autem nobiscum ageretur, ex jam cognitis ante florem & semen si plantas dignoscere non possemus, *quercum* e. g. ab *abiete*, quas per folia & ligna facilè distinguit quivis è vulgo.

IV.

Nihilne commercii Botanica cum Mathesi? Imò verò; suppetunt specimina ex nobili Proportionum Doctrinâ; & ex Geographiâ recentior botanica novam planè induit faciem; quicquid sit de respectu plantarum ad planetas.

Liceat pro hâc thesi aliquid mutuari aliundè, & ex sublimi scientiâ, ejusque ad naturam corporum applicatione, proferre, quod reliquit Vir in hoc quondam felix studiorum genere. Sc. tempestivum videtur meminisse *Kepleri* nostri, (nam ex hâc Almâ prodiit, *Mæstlini* discipulus, major Magistro) cùm de collectim edendis Ejus operibus fama sonat. Ipse autem primus, quantum mihi constat, *nivis sexangula* observator, de miri ratione phænomeni sollicitus inter alia respexit etiam ad plantarum figuras & numeros, eâque occasione hæc scripsit: "Si quærat, cur omnes adeò arbores & frutices (aut certè pleræque) florem explicent formâ, quinquangulari, numero sc foliorum quinario, quem florem in, pomis & pyris sequitur fructûs dispositio in eodem vel cognato, numero, quinario vel denario: quini intus loculi continendis seminibus, dena filamenta: quod & obtinet in cucumeribus, & id, genus aliis; hîc inquam locum habet speculatio pulchritudinis, aut,

„proprietatis figuræ, quæ animam harum plantarum characterisavit.
 „Et detegam obiter meas considerationes super hâc re. Duo sunt
 „corpora regularia, dodecaedron & icosædron, quorum illud quin-
 „quangulis figuratur expressis, hoc triangulis quidem, sed in quin-
 „quanguli formam coaptatis. Utrumque horum corporum, ipsius-
 „que adeo quinquanguli structura perfici non potest, sine propor-
 „tione illâ, quam hodierni Geometræ divinam appellant. Est au-
 „tem sic comparata, ut duo minores proportionis continuæ termini
 „juncti constituent tertium; semperque additi duo proximi, con-
 „stituant immediatè sequentem, eâdem semper durante proportio-
 „ne, in infinitum usque. In numeris exemplum perfectum dare est
 „impossibile. Quò longius tamen progredimur ab unitate, hoc fit
 „exemplum perfectius. Sint minimi 1. & 1. quos imaginaberis inæ-
 „quales. Adde, fient 2. cui adde majorem, fient 3. cui adde 2.
 „fient 5. cui adde 3. fient 8. cui adde 5. fient 13. cui adde 8. fient 21.
 „Semper enim ut 5. ad 8. sic 8. ad 13. ferè, & ut 8. ad 13. sic 13. ad
 „21. ferè. Ad hujus proportionis se ipsam propagantis similitudi-
 „nem, puto effectam esse facultatem seminariam; itaque in flore
 „præfertur seminariæ facultatis *γυνώσκον* vexillum quinquangulum.
 „Mitto cætera, quæ ad hujus rei confirmationem jucundissima con-
 „templatione possent adduci. Sed proprius illis debetur locus.
 „Nunc hæc exempli tantum causâ præmisimus, ut in rimandâ figu-
 „râ nivis sexangulæ simus instructiores, exercitatioresque., *Et in*
sequentibus: „Alba lilia trinis senisque effigiantur foliis, & sterilia
 „non sunt; Eodem modo multi calyces florum ferè sylvestrium.
 „Nisi fortè hoc discriminis sit, quod fructus sub flore quinquangu-
 „lo enascitur carnosus, ut in pomis pyrisque, aut pulpaceus, ut in
 „rosâ, cucumeribus, feminibus intra carnem vel pulpam abditis.
 „At sub flore sexangulo nil enascitur, nisi semen in sicco loculo,
 „estque velut in flore fructus. Aut est hoc forte discrimen, quod
 „nullus flos sexangulus in arboribus & fructibus sed in herbis & fe-
 „rè bulbaceis. Vel consideret alius ipsos succos, an aliquod in iis
 „discrimen secundum figuras florum. Res mihi nondum comper-
 „ta est, itaque sufficiat leviter admonuisse alios de hâc quartâ causâ.,
 Sic etiam in tractatu, *Tertius interveniens*, ubi agit de *planetarum aspe-*
ctibus; concordantiis musicis non nisi sub certis proportionibus,
 negatque, septangulum regulare posse sciri vel duci, superaddit:

Darum wir auch kein corpus oder andere dinge in in der Welt finden, das von Gott nach einem septangulo, nonangulo, undecangulo, wäre gemacht und specificirt worden, &c. Et in seqq. es finden sich vvol einzelne Früchten und Blumen, die siben, neun, oder eilf fache oder Blätter haben, vwann die species in ihren individuis gemeiniglich variiert; aber kein species findet sich nicht, die diese zahl beständig hätte, vwie fünf, sechs, vier, drey, zehen, zvvölf. Quemadmodum hæc observanda ulterius & examinanda suo tempori reservo, interim iudicio botanicorum geometrizantium submittens, ita pro thesi modò præmissâ illud etiam inde colligere forsan potero, eandem fore petalorum & monopetalilaciniarum rationem vel non abfimilem. Nobilis autem proportionum doctrina considerari posset ulterius in petalorum, apicum, feminum, feminalium conceptaculorum mutuo ad invicem respectu. Proportio, quæ ipsis intercedit, non semper est æqualis, sed sæpe inæqualis, hîc dupla, ibi subdupla, illic sesquialtera, nec pauci valdè multipla: Et conquiri possent plura, nisi transeundum foret ad *Botanicam Geographicam*.

Quantum debeat peregrinationibus Medicorum Botanica, præter & post *Clusii, Rauwolfii, Alpini, Veslingii, Hermannii, ten Rhine, Cleyeri, &c.* & Curiosissimi *Kämpferi*, (dolendum, ante suorum editionem demortui.) illustri exemplo patet, etiam præcoci nimis facto abrepti, *Tourneforti*, quippe, qui non modò *topographiam botanicam* conscripserat; verum etiam constitutis à se quondam 673. plantarum generibus, & 8846. speciebus, ab itinere ex Oriente redux, nova quæ superadderet genera non quidem nisi 25. species autem habuit novas 1356. *Act. Acad. Gall. Sci.* ann. 03. Ut non sit mirum, de novâ *Pinacis* editione, & ad nostra usque tempora continuatione cogitari, *C. Bauhinus* enim in frontispicio plantarum circa 6. millia promiserat: Complementum autem ipsius promittit exoptatum socia opera *Excc. Zwingeri & Wollebii*. Vixdum finis erit; Ita enim iudico ex conspectu 50. plantarum novarum, medicinalium Americanarum *Fevillei* in *Act. Lips.* ann. 15. & perlectione *Supplementi*, quod historiæ suæ dedit *Ramus*, præter ingentem ex omnibus mundi plagis confluxum, ex solo unius anguli, extremi Africæ promontorii, plantarum, *Capensium* indè dictarum, numero grandi. Laudati autem Viri institutum, referendi plantas ad suum natale solum, quid hîc sit proprium, quidve

quidve commune zonis & climatibus, orbi veteri & novo, specimine stirpium Britannicarum, & Europæarum extra Britanniam nascentium exhibito, singularem utique spirat Geographiam, cur non omnis ferat omnia tellus, sed quid quæque sibi ferat proprium, ad intimum naturæ finem pertingit, cui quæ soli solisve conveniat vel sufficiat ratio, utrum dispersa per orbem opportunis tamen locis primæva germina diversarum adeò plantarum requirantur, inquiri, quin & disceptari merebitur. Quàm curiosum enim illud Celebris Peregrinatoris, *Bernieri*, in ascensu, si rectè memini, montis plantas ex suâ Europâ sibi notas, in descensu novas Indiæ istius Orientalis, observantis? Quod hîc potissimum, importat, concernit respectum plantarum orbis novi ad nostras veteris, qui benè diversus est, modò satis propè accedens ad invicem, modò ut toto cœlo, sic & genere toto ab invicem distans, tabulas ita botanicas tam extendens, quàm reformans. Sic ad *solanum*, ad *chrysanthemum* non malè quadrant *radices* Indicæ, jam *culinares*, quia *tuberosæ*, *esculentæ*: Aliis vero cum modo nostratum non benè convenit, vel solius *Cardamindi* exemplo, *mirabilis peruviana*, &c. ne quid dicam de excerpendis è *Suppl. Raji* magno numero novis ad regulam Europæam non factis; Sit e.g. arbor *cucurbitifera*, *uvifera*, *tulipifera*, *scolymocephalus*, *tetragonocarpos*, *saururus*, *rizophora*, *bandura*, *viscum caryophylloides*, &c. Quamcunque dicatur accidentalis, quæ à tempore & loco sumitur plantarum differentia, juvat tamen omninò scire, & pudet ignorare, quo quæque florem, quo semen ferat: utrum verna sit, vel æstiva, pratensis vel arvensis, alpestris, palustris, &c. nam & hisce sua est constantia naturæ sibi relictæ; juxta thesin *Parentis* primam jam olim in *Disp. d. Plant. Vern.*

Altius ascenderem, stellas quasi cœlo deducerem, nisi prætenfa quibusdam harmonia plantarum cum planetis, vel dependentia ab his, cum vexato astrorum influxu, nimis me abduceret. Audiam tamen rationes, & pensitabo, si cui placeat *Saturno*, *Marti* malignas, benignas *Jovi*, &c. adscribere vel negare. Non ausim talium curiosos remittere ad *Corn. Agrippæ* occult. philos. l. i. c. 22. sqq. & adjungere *C. Portæ* phytognomonicam, sc. plantarum quasi physiognomiam; quia superstitionis notam incurrerunt, quo jure, meum modò non est disquirere.

V.

ſam verò, Phyſica ſibi Botanicam ſi vendicare velit, quid conſilii? R. Jure ſuo id faciet: Reſolvat corpus mixtum chymicè, ſtructurum anatomicè: reddat rationes nutritionis & generationis; Medicus hoc non feret agrè, ſed his præcognitis faciliùs progredietur ad uſum in ſua praxi.

Tantum de me non præſumo, ut chymix ad Regnum vegetabile determinationem paucis expedire auſim lineis, ſufficiet pro ſcopo celebriores examini ſubmittere controverſias, huc ſpectantes. Ante omnia, quo jure ſuum hîc ignis tueatur prædicatum, quo voluit dici genuinus corporum *analyſta*? Utrum eodem, quo in minerali, ubi ex quaſi principiis in quæ reſolvitur, iterum componitur, regeneratur *nitrum, vitriolum, ſulphur, cinabaris*? Non æquè translationi plantarum *analytica* reſpondet *ſynthetica*, non ita reprodu- citur priſtina ſpecifica ipſarum natura, quacunque combinentur iterum ratione, quæ prius ex earum reſolutione fuerant obtenta. *Vinum*, ſuo ſpiritu, phlegmate, oleo, terrâ confuſum ſchema exhibens, demonſtrat minus ſimplicem ac ſinceram fuiſſe ſui analyſin, quia ſyntheſis non reſtituit mixtum, multò minùs ſtructurum.

Utrum ergò ignis chymici productum *ſal vegetabile*? Quò minus hoc ſimpliciter concedam, ſed ut modificationem etiam præ- exiſtentis principii ſalini ponam, moveor exemplo ſalium tam *effentialium*, in quorum cenſu eminet tartarus, de quo ſtatim, quàm *volatilium* urinoſorum, non ſolâ quippe aduſtionis vi parandorum, ut xylinum *ſcretæ*, piſorum *Boylei* in app. Chym. Scept. (ſcil.è ſic- cis, nam è viridibus acidum, è fermentatis inflammabilem ſingulari dexteritate monſtravit ſpiritum.) vel ſpongiæ, (plantas enim marinas præbere plus ſalis volatilis, quàm cervi cornu, docent *Ad. Acad. Sci. Gall.* ann. 1710.) Sed & obtinendorum motu inteſtino, non plenè putredinis reſolutorio, ut illud, quo primùm capto incla- ruit *Wedelius*, ex conquaſſatâ, conglobatâ, & incalſcente *Iſatis* maſſâ exhalans, quippe quod non tam fit, quàm movetur gradu illo ignis inferiori.

Porro famoſæ litis materia fuit *Spiritus vini*, cum vel ſine *acido*, quam judicio Reg. Angl. Societatis quondam ſubmiſit *Kunkelinus*; Re- ſponſum, deciſum, an obtinuerit, neſcio, dubito: Interim affeclas vix invenit in eo, quòd illius etiam exemplo *ſulphur* principiorum

numero voluit exclusum ; qui tamen si displiceat terminus, substitui posse *phlogiston*, inflammabile, quod cum acido vitriolico sulphur constituat minerale, docuit, genesin & naturam miræ istius aquæ ardentis declaravit in *Zymotechniâ*, *Stablinus*.

Exemplo *tartari* usus fuit *Helmontius* in examine trium principiorum, inter instantias quàm plurimas, acidum illius in oleum mutari regerens & oggerens *Paracelso* cum suis sequacibus. Attendi meretur in & à destillatione primò *Gas* Ipsius, utcunque captum, seu *Spiritus Tartari*, *naturæ* non simplicis, sed *triplicis* ferè, juxta id, quod commune est spiritibus plantarum per retortam destillatis, qui jam olim fuerunt exhibiti in *Disp. Inaug. Dn. D. Rothii*, d. *Scordio*, tanquam *adiaphori Boyleo*, loc. cit. participantes tamen insuper tam de *urinoso*, quàm de *acido*: Hoc autem in *Ad. Lips.* ann. 06. uti acetum, à *Ludovico*, dicitur *naturæ* non vitriolicæ, sed *nitrosæ*. Sequitur oleum tartari, *foetidum* illud & *empyrevmaticum*, in quo acidum istud inflammabili nupfisse, & sub hoc connubio occultari, conforme videtur dictis. Superest *alkali*, in quod utrum figi volatile, vel abire, mutari soleat acidum, duo isti pugiles, & sic datur principiorum transmutatio, disputationi reservo.

Ejus saltim occasione controversiam citabo practicam: Cur non contentus *sale volatili*, parcius quidem è *tartaro*, largius è *vini facibus* obtinendo, *Helmontius*, quam habuerit rationem commendandi medicis *volatilisationem fixi salis*? Quam præ illo hoc habeat prærogativam? An tueatur titulum, quo voluit audire *Vicarins Alcabesti*? Quis sit modus genuinus captandi hanc aviculam? Utrum ille apud *Lullium* rediviv. denud. exper. 9. aut in *Beccher. Suppl. 2. th. vi.* vel utrum sit adhuc inter reservata adeptorum? de quorum occultis difficile est iudicium.

Utrum igitur, pergendo ad *Plantarum Anatomen*, clarior est ratio mixturæ specificæ vegetabilis, actûs vitalis, nutritionis post inspectionem structuræ corporis organici, factam tantâ diligentia, oculis non nudis modò, sed & armatis *Malpighii*, *Grevvii*, postquam de tracheis pro aëre, de vasis, fistulis pro succo, ad analogiam sanguinis circulando, constat? Sive fermento, seu pororum *figura* quis velit uti, sive secerni velit, seu formari, ex eâdem, in philosophiâ *Thaletis*, aquâ, quod vicinas in eodem campo vel horto, diversi adeò facit odoris & saporis, amari dulcis, acidi acris, plantas, salubres & venenatas, multum undique incurret obscuri;

utrum

utrum fateri malit mecum, harere sibi aquam, expectare fas est.
 I. A. *Borellus* d. Mot. Anim. prop. 127. ad analogiam cribri, & operis musivi, ad figuras particularum & foraminum, ad ceram, quæ figuram induit cavi, per quod adigitur, &c. respicit, ita tamen, ut necessitatem illam dispositionis ordinari sub finem fateatur ab architectonicâ divinâ sapientiâ. conf. omnino prop. 180. Qui in *Giorn. d' Ital.* tom. xvii. rarum exposuit Colocasiæ florem, *Fantastus*, plantas non tam diversum haurire vult succum, quàm facere, hanc propriam ipsis tribuit virtutem, & ab esse ipsarum deducit specifico. Ulteriore mechanica ad botanicam pro motu succi applicationem, cum solitâ solidâ epicrissi, exhibuit Exc. & Honor. *Patruus*, Dn. D. E. C. in Epist. Taur. nr. ix.

A Nutritione ad Generationem: Ubi pietas vetat deferere thesin, quam olim *Vener. Parens* in Epist. ad Exc. Dn. *Valentini* de sexu plantarum proposuit, de generatione plantarum & animalium univocâ, univocè in utroque regno explicandâ, necessarios *vesiculis* conceptaculorum *apices* floridos superaddendo, ut emergat ovum, semen fecundam, novus conceptus. Etenim verosimilis, & naturæ conformis admodum videtur illa sententia, & approbationem hæcenus à primo suo inventore *Nehem. Grevv* meruit multorum, Non quidem *Tourneforti*; Sed cui respondit in app. Cent. VI. *Misc. Nat. Cur. Dilig. Dillenius*, & ingeniosè prorsus extendit vires & usum *pollinis*, male pro semine habiti, ad spem novæ plantæ in futurum, in subjectis germinibus *capillarum*. Ipse *Helmontius*, cui cit. Dispens. sexus audit scenicus, naturam tamen notavit promiscuo & androgyno contentam; quod ex *Aristotele* desumptum, conforme nostræ sententiæ, verum est de pluribus, non de omnibus. *Morlandus* quidem, ut ex *Act. Lips.* ann. 05. intelligo, in hac geniturâ vegetabili, quale quid in animali *Leeuwenhæck* vidisse voluit, pratendit esse germen organicum; Sed quod nec laud. *Dillenius*, nec Cel *Geoffroy* in act. acad. sci. ao. 11. vel microscopii beneficio viderunt, vel expresserunt; Problema sit, utrum ratio id exigat? Sc. præexistentiam plantulæ feminalis in apicum farinâ, & insinuationem jam formati corpusculi utut minimi in vesiculas foemininas? Non me latet tentata conciliatio sententiarum de Generatione ex ovo & verme, per *Leibnizium*; ego verò per modestiam, quæ juvenem decet, tantum mihi non sumo, ut super hac re tam obscurâ iudicium mihi arrogem.

VI.

Quid vetat, quò minus Medicina superaddatur Botanica: Etenim vivit & valet planta, benè, malè, cultura forsàn indiga, habet hominem, qui ipsius curam gerit, sui gratiâ, indè quippe vitum & amictum sibi sperans, & usum multiplicem.

Quid faciat letas segetes, quo sydere terram Vertere - - - ulmisque adungere vites Conveniat, canentem legimus *Virgilium*, per duos *Georgicorum* libros priores: Utrum veriùs, an elegantius? Etenim *Seneca* non dubitavit scribere in epist. 86. non quid verissimè, sed quid decentissimè, diceretur, aspexit; nec agricolas docere voluit, sed legentes delectare. Noverit hoc laudatus ille *Dnm. Trivoltiensibus P. Catron*; quàm benè de poetâ, vel poetæ lectoribus meritis! Ex capite quidem jucundi & utilis curiosis commendare aufim *P. Laurembergii Horticulturam*, benè scriptam. Tria sunt, quæ per culturam intenduntur, obtinentur, præcipua: multiplicatio, acceleratio, melioratio. Perficiuntur plantarum flores in plenitudine, colore, odore, an & figurâ, fructus in magnitudine, multitudine, sapore, & sic porrò, ad uberem herbæ proventum, radicum crassitiem, mollitiem, ligni soliditatem, fibrarum longitudinem & gracilitatem, &c. Huc ergo spectant artes, quibus inclarescunt *Cel. Volcammeri Fratres Noribergæ, Lipsiæ Cur. Lehmannus*, floræ præcoci, tardæ aliàs naturæ, jam vel in ipsâ hyeme per anticipationem sollicitator, *Ingen Kûfnerus*, & occupatissimus *Agricola*, quibus proin felices tentaminum successus comprecari fas erit. Nec prætermittendus hîc *Vallemontius*, ingeniosus collector, & quorundam observator ipse, sed vel ex eo capite memorandus, quod nitrosos ex *Virgilio* pro macerandis seminibus promit liquores: Sine præjudicio cujuscunque, ne quis se prætermisum, vel laude suâ defraudatum, conqueratur; ut qui in *Act. Lips. ann. 10. schema insitionis inverse exhibuit pyramidale*, & qui vitro munitas, fornace instructas ædes habent, ubi suas ostentant *Ananas, draconem, cereum, melocactum*, quin ipsam caffè, quâ delectati arbore leguntur *Galli in act. trivolt.* & cujus germen è femine prodiens vidi primùm *Stutgardiæ apud Dn. D. Bœbium*. Liceat hâc occasione provocare observationes *Botanophilorum*: Utrum feliciores hortulano nostro, cui *caryophyllus iridi, chelidonio, &c. insitus*, necdum comprehendit, tantum abest, ut flores cœruleos, flavos obtineret; cui etiam *insitio surenlorum* in arborum radices vel germinationis caruit successu, vel gaudii fuit non durabilis.

In ordine proponendarum hinc quaestionum disputabilium pos-
sit esse prima: *Agrestes, Sylvestres, à sativis, hortensibus*, quæ & quan-
tum differant? Apud *Rajum* in Hist. L. 26. c. 2. *pyrum sylvestrem*,
cultu mutari posse in mitem, *Theophrastus* disertis verbis negat: *Sca-*
liger affirmat. Quod quanquam laudatus ille Botanicus hunc ex-
pertum fuisse vix credat, priori tamen capite de *malo* sententiam
illam, è *Platonis Timæo* haustam (nimirum fativas omnes arbores
olim fuisse feras, neque à se ipsis, nisi cultu differre) approbat, in-
telligendam de arboribus, quales nunc sunt, postquam terra male-
dicta est, non quales olim creabantur; quod quidem aliis expedi-
endum relinquo, quantum, præter id quod natura soli & culturæ
modus importat, in suo esse fuerint mutatae plantæ? Cum porro
l. 27 c. 11. *oleam sativam* à sylvestri, *oleastro*, culturâ tantum differre
præendant botanici, & sativam, si negligatur, in sylvestrem abire,
& sylvestrem ex sativæ nucleo nasci; proponi ulterior de re bota-
nica sollicitis, non nisi expertis decidenda, poterit quaestio: Utrum,
arbores è mali & pyri hortensium & cultarum feminibus satis ortæ
non semper degenerent in naturam sylvestriam, sed interdum sa-
pidiores & mitiores, generosioresve fructus edant, quàm earundem
matres, s. productrices; contra quàm vulgò creditum & receptum
est: juxta *Scharroccium* l. c. l. 1. c. 20.

Veniat, si placet, ulterius in disputationem: Quo artificio *ma-*
lus privetur flore, i. e. non petalis modò speciosis, verum etiam api-
cibus, & consequenter feminibus, ut poma tamen ferat? Sed quæ
per me nomen ferent *ovorum subventaneorum*, sensu, quo bacca mori
hoc ferunt prædicatum in misc. nat. cur. d. 2. ann. 9. *Opulus*, exclu-
sis mediis floribus, quæ fiat rosea? Sterilis illa. Utrum crescenti
lunæ quid debeat *plenitudo florum*; an sufficiat τὸ novale? Quæ ta-
men ratione apud nos *Nasturtium Indicum* necdum est factum ple-
num, quale quidem laudavit *Sherardus Rajo*. Hæc petalorum mul-
tiplicatio ad exclusionem in quibusdam apicum & stylium, atque
adeò in præjudicium seminis, facta, an & quomodo concilianda
cum prætenso *semine primævo*? vel ex *ratione* thes. ult. *Disp. d. plant.*
vern? Quæ autem ratio *salices* facit *roseas*, quarum figura in *misc.*
nat. cur? quarum copiam in illâ specie, quæ à foliis subcœruleis, ad-
versis, nomen habet humilior, tulit hic annus. Quibus adde *can-*
tes monstruosè latos variarum herbarum ad fasciæ similitudinem
quamcunque, §. xv. laud. *Disp. B. Avi d. Cichor*, Et ex *misc. nat. cur*.

3. 4. *Hysteron Proteron* botanicum Cel. *Lentilii*, pyrum flore suo insignis: Ex iisdem 3. 5. Exc. I. *M. Hoffmanni* *Cerasa* acida prolifera, novis ex se quasi protrusis germinibus, cum humido abundante saturæ creparent: Denique *figuram crucis in ligno fagi*, quam dexterrimè Cel. Acad. Nat. Cur. Præsides, Dn. D. *Schrœck* in non satis laudand. miscell. 3. 7. ad incisiones quondam tenellæ arbori factas, retulit.

Ex morbis, quibus obnoxia plantæ, subnascitur dubitandi ratio: *Lustilago* (non infrequens iterum nuperæ messi nostræ, zeæ, hordei, cum *rubigine* culmorum) morbisne accensenda internis, an externis? Juxta *Rajum* l. c. cap. 30. dispositio est in ipso semine, quamvis fortasse detur aliqua causa procataretica, s. externa, quæ in materiam dispositam agens morbum facile inducat. *B. Wepferus* in *misc. nat. cur.* 2. x. p. 324. circa radices frumenti, cujus aristæ nigrescunt, minutissimos vermiculos rubicundos reperiri ait. Sed de isto frugum vitio, obiter etiam de famosis per Galliam & Saxoniam *clavis seccis*, actum fuit *pecul. Disp.* Dn. D. *Planeri*.

Prostat sub eodem habita præsidio altera de *gelicidio*, & revocat in memoriam in *novell. reip. liter.* Cel. *Bernardi* ann. 05, agitatam controversiam: A quonam præcisè lædantur, destruantur vere præcocia plantarum germina, quin & serotini autumnus fructus, uvæ; ruptisne vasculis per ipsum pruina gelu, vel per supervenientium radiorum solis calorem expansivum? *Huic Sol est ensis, qui vulnerat; illi gelu rumpit tubulos.*

Ex post facto responderi poterit, uter rectius? Qui post graves extraordinariæ *diræ hyemis*, unius & alterius, injurias, *vites* resevit, quin radicibus evulsis, de novo sibi prospiciens in futurum melioribus; vel qui suo hætenus fato reliquit vineam, passim aspectu minus lætam.

Cæterum de morbis plantarum observationes post laudatos etiam exhibuit in *Act. Acad. Sci.* ann. 05. *Tournefortus*, & de *Gallis* ex professo egit *Malpighius*; quibus addi merebantur *uvæ* quondam, magnæ per patriam famæ, *quercuum in Asperg*, scil. quid fuerint, singulari declaratæ oratione Parentis; Et *Rosarum Spongia*, prætensum amuletum hæmorrhoidale, alcali volatile, nidus insecti, *Giorn. d' Ital.* tom. viii. ubi de *Chermes*, *Cochinellâ*, *Cimi*. e plura; quanto magis adhuc paradoxum *Zoophyton*, de quo *Cestonius* ad *Vallisnierum* t. xxv. insectum sc. adeò fecundum, ut granum vel 4000. cc. ovula contineat, quod egressum à matre vadit per folium, affigitur, pau-

paulatim crescit, perdit figuram animalis, & devenit granum, *plant-animal*. Vermiculos in visceribus pomorum non intus generari, sed per foramina, quæ oculos nudos fugiant, intrare, Laud. *Hesperidum cultor Noricus*. Fungos autem gallis contradistinctos ab exsudatione succi, prolongatione fibrarum, curiosè ad Com. *Marsilium* deduxit *Lancisius*: Nec minus per analogiam morbosas fungosas capitis excrescentias polyposas ex laudatissimâ suâ praxi declaravit *Exc. Arch. Dn. D. Mæglingus*, in ult. cent misc. nat. cur.

De Morte plantarum ut verbum addam, quid videtur de illo *Helmontii*, Magn. Oport. §. 10? *Granum sic in terrâ moritur, ut per vitam mediam suam novas proles excitet in sænus*. Benigna explicatio peti poterit ex §. 28. quin ex ign. hosp. morb. §. 38. 40. & ex id. morb. §. 31. Suam huic ordini viventium infimo accommodare *hygienen* & *therapeuticen*, tam pharmaceuticam, quàm chirurgicam, superat instituti modulum: Modum rei posuit Auctor naturæ; nil quidem invitâ naturâ, mirum tamen quàm flectatur & dirigatur ab arte, quò per se sola vix pertingeret, uti exemplo declaratum fuit, non uno.

VII.

Tandem Botanica exhibet Medicis tam morborum causas agnoscendas, curandas, quàm morborum remedia, materiam medicam, veterem & novam, pharmaciâ galenicâ & chymicâ preparandam & componendam, pro usu externo & interno; ne quid de dietâ dicam vegetabili, tam immediatè, quàm mediatè tali.

Terra enim non spinas modò fert & tribulos, quæ cutem pungant, sed & stimulos cum fermento, qui intimius admissi, vel incautè devorati, vel malè obtrusi, veneni vim exercent. Singulâri studio hoc thema excoluit *Wepferus*, & pathologicè & therapeutice, in tract. d. Cic. *Aq.* Quam ex obs. in misc. nat. cur. dec. 2. ann. 6. & ex suppl. hist. plant. *Raji* fuisse constat *Oenanthen cicutæ facie Lobelii*. Ubi illud omninò mirum, *cicutam*, quæ magnum (si *Senecam* audias.) fecit *Socratem*, virulentam non æquè ubique apprehendi; Etenim radices ipsius, in angliâ nascentis, fuisse sapore satis grato, devoratas ad uncias tres, quatuorve, impunè. Utrum culturæ, vel natalis soli beneficio? ut in misc. nat. cur. dec. 3. ann. ult. *napellus* montium intulit anxietates, deliquia, non æquè alter

alter in horto cultus. Etiam *pastinacæ* radix delirii causa perhibetur, laud. misc dec. 3. ann. 2. sed annosa, proprio mihi quoque experimento suspecta. Quis autem à pulchro illo *ranunculi* pleno flore miniato, utut inodoro, dolorem tamen & anxietates metuisset; hæc autem intulit externè solùm admotus l. c. dec. 3. ann. ult. Et quis non condoluisset dominis avicularum canariensium mirè docilium vix degustatâ *amygdalâ amarâ* extinetarum, misc. nat. cur. d. 3. a. 1. obs. 156. cum Scholio Laud. Præf. Cel. Dn. D. Schrækkii. Illis, quæ ibidem de *belladonna* leguntur, addi meretur ventriculus à baccarum esu funestè perforatus. ex Act. Acad. Sci. Gall. ann. 03. Et ex ann 04 *mel ponticum*, ab olim malè audiens, sc. ex *chamærodendro*, floris quidem speciosi, sed odoris capiti gravis & noxii: blanditur ergò sub nomine rosæ & lauri Nerion, sed usu suspectum, apocyno cognatum, malignum est, Laud. Dn. *Lochnero*.

Non desunt tamen venenis vegetabilibus *antidota* etiam *vegetabilia*, nec ea pauca, sed benè multa. Eminent duo: *Oleum* & *Acetum*. Legi meretur præfatio *Dioscoridis* ad libr. sext. unde hoc excerpti dignum: Sine morâ calidum oleum ex aquâ, aut seorsum, dare convenit, ut vomitare cogantur, &c. & l. quint. cap. 17. acetum calidum potum, atque vomitionibus redditum, adversus omnia venena efficax est; facit autem in specie mentionem *meconii* & *cicutæ* ex vegg. & cap. seq. subjungit oxymel. Nec hoc modò, sed prius jam ad L. 1. c. 131. ex historiâ antiquâ laudabilem admodum *citriorum pomorum* deprædicavit facultatem adversus venena Commentator *Matthiolus*. Qui gravem porrò proponit quæstionem: *Num venena in statum diem interimere possint?* e. g. in uno mense, vel pluribus, vel ad annum usque, non celerius, neque tardius determinato tempore præfixo. Responsio huic credit: quamvis in eorum numero inveniantur, quæ celerius & quæ tardius interficiant, non propterea tamen præsciri posse terminum certum & diem, sc. ex canone logico, actione æstimandâ non ex solâ vi & modo imprimientis, sed etiam habito respectu ad receptivitatem subiecti. Restringeri posset ad regnum vegetabile quæstio de venenis occultis, tardis, lentis, quæ per famam ita malè audiunt, utrum ex illo, vel duobus cæteris, fumantur vel parentur? De *aconito* quidem ex Theophrasto l. c. ita: *Componi ita ferunt, ut certis occidere temporibus possit, vid. bi-tri-se-mestri, anno completo, nonnullum etiam bien-*

biennio. Pessimè illos de vitâ discedere volunt, qui plurimum temporis resistere possint; paulatim enim tabescat corpus, & languore pereat diuturno, esse necesse. Facillimè illos, qui confestim obeunt. Ego quidem occultum è minerali, ubi sub mole parvâ virtus latet magna, & determinatum ad tempus ex animali, ubi virus hydrophobicum vel quadragesimam medicam Wedelii expectat, observat, potius fuisset suspicatus; sed artes occultas malignas (utinam mansissent occultæ, Germanis maneant ignotæ!) præstaret cavere, aut curare, quàm docere: si modò fieri illud possit, absque eo, ut ipsorum natura & signa præcognoscantur. Eò autem usque invaluisse perhibetur occulta fraudum malignitas, ut non assumpta, modò, sed & admota corpori, & hausta per nares, ignaris, incautis insinuari possint, quæ cum suis antidotis tam generalibus, quàm specificis, non aliter huc spectant, quàm quæ ex regno vegetabili possent prætendi; secus ac ex comparatione phenomorum ex triplici notabilium quidem videtur. Legi meretur Mithridates Cel. *Hencheri*; occurrit etiam aliquid in tr. d. cinab. *Bekeri* pharm. reg. Hafn. Quantò magis absolvi hoc thema præstolamur ab Exc. Dn. Prof. & Arch. D. *Zellero*, quod in promotionibus doctoralibus ipsum auscultavimus exquisitè perorantem.

Dieta vegetabilis tria subministrat: Primò, vitandos cibos mali succi, & famosum in specie errorem lolii temulenti, avenæ permixti, in pulmentis, de quo in *misc. nat. cur.* dec. 3. ann. 3. item in *Eteodr. Cel. Lentilii*, & *Disp. Inaug. Dn. D. Seegeri*. Deindè, agnoscendum usum mediatum, quem præbent homini, quæ ipsi per se non præbent cibum, cedunt tamen in pabulum pecori, cujus lacte vescitur & carne, ubi notabilis omnino vita media, s. magnum, oportet *Helmontii*, §. 22. remanentia proprietatum de cibis in alito & constituto: exemplo carniū, e. g. bovillæ brassicam autumnō, haud obscurè redolentium, piscium in limo, &c. Notabilis est in *Giorn. d'ital.* t. xxiv. differentia carnis *ranarum* pro esu per diversitatem loci & cibi: Tutior in regionibus calidis caro ipsarum in lacubus degentium, ubi vescuntur lenticulâ, quàm fluviis, ubi insectis; Neapoli ab hac ardor urinæ & ischuria. Tertiò, comparandum cibum vegetabilem & animale; uter sanitati nostræ melius & diutius conservandæ convenientior? Ad respondendum hîc plus experientiæ & attentionis requiritur, quàm vulgò

suppetit. Intermiffi quidem carniū esūs rationem in epist. *Seneca* 108. philosophus dedit non simplicem; quæ transeat modò. Sed Exc. *Bergerus* diff. d. vit. long. inter causas abbreviationis, cū à primâ simplicitate desciscerent homines, terræ fructus ipsis non sufficerent, non solenne modò carniū condimentum, *Sal*, quod alterius est regni, sed & receptum universè usum *fermenti*, quod proprium est vegetabili, accusavit, sub eo tam panes quàm potus fermentatos, vinum, acetum, cerevisiam intelligens. Prærogativam ergò cibi, præ animali, vegetabilis sub examen vocari facile patiar: Interim huc etiam refero *abstinentiam* & *nauseam carniū in morbis*, præcipuè *acutis*, *Stahlii*, conformiter *Helmontio* d. febb. c. 12. §. 4. 5.

Hinc & in considerationem veniunt nova in victum usumque publicum introducta, quæ nostram quasi reformarunt Europam, quia sunt de penu botanicâ. Intellego tria præcipuè notoria: Primo loco stat *Spiritus Vini*, frumenti, ceraforum, juniperi, cum rossoli, essentiis menthæ, aurantiorum, & simil. quorum non est finis, sed delicatæ præparationis dexteritas. Utrum mereantur titulum aquæ vitæ, vel in præjudicium sanitatis bibantur per abusum. Remitto de his sollicitos ad Disp. Inaug. Exp. Dn. *Brejeri*, d. aq. ardent. *Lifterus* in laud. exerc. Spiritum vini invalescentis Anglorum hydropis causam, *Stahlius* corticis abusum, arguit. Redux Ille ab itinere gallico scripsit mirabundus, cur Parisiensibus (quasi verò his solis?) *theæ* & *caffé* usus tantoperè arrideat? Et ex peculiari Dei providentiâ fieri audet asserere, quò increscens hominum numerus, ceu lentâ tabe sensim absumeretur; Cui tamen dubio singularem destinavit disputationem *D. Luther*. Unde Alterum ex novis nostris esset *Thermoposia*, de quâ egregii suppetunt Scriptores, ad quos remittere B. L. consultius est, quàm non pro dignitate dicere; Meretur legi post *Pechlini* Theophilum Bibaculum, *Land. Dn. Patru* Dissert. singul. d. usu & abusu potuum. Item in misc. nat. cur. ann. penult. obs. Cel. *Thomajii* de theâ roseâ, & Exc. *Lochneri* tom. ult. appendix. Tertium est *Tabaci fumus* & *errhinus pulvis*, de quo brevior finit esse Pica nasûs *Cohanjii*: Ille verò fumus, quandoquidem adeò invaluit, ut medicorum approbationem negligat & contemnat, detur pituitæ, penuriæ, consuetudini, ne sine censurâ medicâ dimittatur, & ut ad quæstionem

istam

istam generalem ex duplici communi principio (*suum cuique tribuendum; auream servandam esse mediocritatem.*) utcunque respondeatur.

Fluit indè hæc etiam quæstio: *Medicamenta ex vegetabili desumpta regno an tutiora mineralibus?* Quò minus hoc absolute possit dici, obstant instantiæ utrinque reciproæ. Sunt cæteris regnis sua, quæ se commendant non solâ efficacîâ, sed & usu satis tuto: Non desunt vegetabili dicta venena, insuper alia drastica, nonnisi sub cautelâ circumspectè & prudenter exhibenda. Huc autem omninò spectat *Diff. Cel. Fr. Hoffmanni* de medicamentis insecuris; cujus cæteræ dispp. de themate vegetabili, e.g. balsamo, balsamicis, opio, vino rhenano, &c. meâ laude non indigent. Uti pariter Regnum Vegetabile *Cel. Em. Kœnig*, quod editionem meruit non unam, per se jam commendatum sibi habent Philiatrî. Scilicet hæc est ad hanc quoque Medicinæ partem via, per experientiam & rationem, laudata singul. orat. *Exc. Dn. D. Verdries*.

Quandoquidem verò pars magna materiæ medicæ petitur aliunde, vix declinari potest quæstio ulterior: *Exoticis vegetabilibus an dari possint domestica succedanea?* Quid videatur de avtarcia europæ? quàm indiget hæc reliquis mundi nostri partibus, ut per mare per terras extremos currat mercator ad Indos? De peregrinis quidem consulendus *Cel. Valentini* in Museo; De domesticis iudicium difficile. Laudare possum, æquiparare, substituere non ausim, *Corticis peruviano nostratæ fraxini; hypecacoannæ asarum, gratiolæ radicem, ex A. L. 07. (an pro chronicis veratrum?) opio papaver erraticum & album; cacao amygdalas; caffè bordenum, secale, fabam; quajaco, sarsæ, lapathum, saponariam, cruciatam, cum lignis nostratibus; aromatibus indicis germanum carvi, juniperum, crocum, &c.* Ex solis misc. nat. cur. simplicium vegetabilium copia laudabilis colligi, & formari fuppellex botanica posset egregia. Dedit per lineas medicas, per & millenarium, *Cel. Riedlinus*; dedit *Exp. ꝑ. Francus* in d. trifol. fibr. veronicâ, alleluja; Ut plures passim de singularibus benè meriti: Et in Dispp. atque Collegio Casuali mscr. B. *Avi* suppetit mihi abundè, quod juvet sequi, imitari, circa laudes materiæ medicæ vegetabilis.

Quæ autem vegetabilium *pharmacia* dicetur præstantior? Injurius videri possem in gloriosam chymiam, si quidquam in præiudicium ejus pro galenicâ ita dictâ scriberem. Tuebor me tamen

exemplo *Theophrasti* (non illius *Eresii*, sed) *Paracelsi* & *Helmontii*, per quendam quasi condescensum in praxi ad *simplicia* se demittentium; Ita enim hic in princip. dispensatorii, ubi laus rei herbariæ: *Arabes*, inquit, *Gentiles*, *barbari*, *sylvestres* atque *Indi* multò vigilantius sua *simplicia* observarunt, cunctis *europeis*; quippe vel à diebus *Platonis* (quibus vixit *Dioscorides*, vir miles,) nihil ferè rei herbariæ est additum. Suppetit etiam *Diff. Cel. Bohni* d. medic. chym. & gal præpoll. dub. ubi §.viii. hæc proponitur quæstio: *An plus præstiterint ac præstent preparata spagyrica, superiore & nostrâ etate officinis introducta, ex his hæcenus præscripta, & ab eorum Magistris ventilata ac vendita præ Galenicis? quin hæc potius & pharmaca simpliciora s. naturalia, ant leviore tantum præparatione expolita ac commendata idem cum illis, imò nonnunquam plus, efficiant, adeoque illis, si non anteponi, certè non postponi, jure queant ac valeant?* Ex vegetabilibus decoctis lignorum, succi herbarum, lachrymæ arborum, gummi ammoniacum, opium, cortex peruvianus, hypecacoanna, &c. in simplicitate suâ præferuntur destillationum, extractionum, &c. artificiis. Lachrymis istis addi meretur *Liquor juglandis polychrestus* *Laud. Dn. Lentilii*, misc. nat. cur. d. 2. a. 5. & ex *Giorn. d' Ital.* quasi pluvia mellis, s. stillicidium florentis *Aloes Americane*, etiam sub porticu constitutæ, aquæ dulcis, sub finem aliquantum acidæ, juxta curiosam descriptionem *Scarellæ*, tom. iv. &c.

Per quæ signa innotescunt, ad quam normam examinandæ sunt plantarum vires vel ignotæ, vel prætenstæ? Nihil prius, nihil potius experientiâ, sub cautelâ fallaciæ non causæ ut causæ. Tutius experiri in brutis, cum grano inde falis procedere ad hominem. A priori non de nihilo sunt odores & sapes; character, familia oggerit verum: Noscitur ex socio, qui non cognoscitur ex se; cautè tamen applicandum. Nec prætermittenda *analysis*, quanquam in *Act. Acad. Sci. Gall.* ann. oi. per observatam solani fur. & brassicæ cap. convenientiam, hoc sensu chymicam, non parum ipsi videatur detractum.

Modus tandem agendi vegetabilium ex quibus deducendus, declarandus principiis? Ex *Act. Lips.* ann. 14. metus est à *Pitcarnio* nos remissum iri ad qualitates occultas, nisi verbis illis irritati vel corpusculares vel chymici clariores dederint naturæ modos motusque, quos Ille sibi fatetur non esse notos; quod cum tempore expectandum, hæc modò pagellarum angustia non expediendum: Quæ plura non capit, quàm debitas & devotas Autori Naturæ laudes & gratias!

SOLI DEO GLORIA.

FINIS